

# Insurans hayat diramal berpotensi berkembang

## Pengguna sedia sertai plan perlindungan jangka panjang

Oleh Shahrizan Salian  
shahrizan@bharian.com.my

**I**NDUSTRI insurans hayat di Malaysia dijangka terus kukuh tahun depan di sebalik ramalan pertumbuhan ekonomi lebih perlahan berbanding tahun ini dengan jualan premium biasa akan menyumbang kepada pengu-kuhan itu.

Berdasarkan perangkaan beberapa tahun kebelakangan, industri insurans hayat di Malaysia biasanya berkembang antara dua hingga tiga kali lebih pantas daripada kadar pertumbuhan ekonomi.

Presiden Persatuan Insurans Hayat Malaysia (LIAM), Md Adnan Md Zain, berkata setakat akhir September lalu, industri insurans hayat di negara ini berkembang 19 peratus berdasarkan jualan premium perniagaan baru yang menepati arah aliran pertumbuhan sebelum ini.

“Pertumbuhan itu disum-

bangkan prestasi kukuh jualan premium biasa yang berkembang 21 peratus berbanding tempoh sama tahun lalu.

“Industri ini turut menyaksikan pertumbuhan kukuh dalam perniagaan premium berkaitan pelaburan yang meningkat 44 peratus,” katanya kepada *Berita Harian* di Petaling Jaya, baru-baru ini.

Jualan perniagaan insurans berkumpulan turut mencatatkan peningkatan sebanyak 13 peratus dengan premium bernilai RM1.82 bilion berbanding RM1.62 bilion tahun lalu.

Md Adnan berkata, perkembangan yang ditunjukkan industri insurans hayat itu mencerminkan peningkatan keyakinan pengguna memperuntukkan pendapatan masing-masing ke dalam plan perlindungan jangka panjang.

“Peningkatan keyakinan pengguna ini hasil beberapa inisiatif kerajaan untuk

menstabilkan keadaan ekonomi, pada masa sama meningkatkan permintaan domestik.

“Kami percaya arah aliran ini akan berterusan pada 2011 dengan kemunculan lebih banyak produk baru untuk memenuhi matlamat kerajaan mencapai sasaran negara berpendapatan tinggi menjelang 2011,” katanya sambil menambah wujud hubungan terus di antara pembentukan negara maju dengan kadar penembusan insurans hayat.

Buat masa ini, kadar penembusan insurans hayat di Malaysia adalah 41 peratus, agak rendah berbanding negara maju seperti Jepun dengan kadar penembusan 400 peratus atau seorang penduduknya memiliki purata empat plan perlindungan.

Berdasarkan perangkaan kasar, ada kira-kira 16 juta penduduk Malaysia yang masih tidak mempunyai sebarang plan perlindungan.

Md Adnan berkata, kadar penembusan insurans hayat yang masih rendah di Malaysia adalah disebabkan beberapa faktor antaranya orang ramai tidak menjadikan rancangan perlindungan masa depan sebagai satu keutamaan dan persepsi salah bahawa mendapatkan plan itu adalah mahal.

“Industri menyediakan banyak plan yang sesuai dengan bajet pengguna. Anda sebenarnya boleh mendapatkan plan insurans hayat pada premium bulanan serendah RM30 atau RM1 sehari untuk perlindungan sebanyak RM50,000,” katanya.

Beliau menegaskan, persepsi salah itu timbul berikutan kurangnya kesedaran dan pengetahuan di kalangan orang ramai mengenai produk insurans hayat.

Justeru, katanya LIAM dan ahlinya akan meneruskan usaha mempromosikan insurans hayat dan kelebihannya kepada orang ramai.



“Pertumbuhan itu disumbangkan prestasi kukuh jualan premium biasa yang berkembang 21 peratus berbanding tempoh sama tahun lalu. Industri ini turut menyaksikan pertumbuhan kukuh dalam perniagaan premium berkaitan pelaburan yang meningkat 44 peratus”

**Md Adnan Md Zain**  
Presiden Persatuan Insurans  
Hayat Malaysia